

HEADLINES (EVENING)

1. Minister of State Dr.BD Chakma-a'n vawiin khana banna, Chief Minister Pu Lal Thanhawla hnenah a thehlut.
2. Chief Minister Pu Lal Thanhawla'n Tlawmngai Pawl hrang hrang te an hmalaknaah fimkhur taka thil tih a ngaih thu a hrilh.
3. MNF, ZNP leh MPC party-te'n nakum Assembly inthlanpuiah Chakma Candidate an neih dawn loh thu an sawi.
4. Tamil Nadu-a AIADMK pawl hniha phel chu hmun khatah an inchhunfin leh ta.

<><><>

MOS TENDERED RESIGNATION:

Minister of State Dr. BD Chakma-a'n vawiin khan a banna Chief Minister Pu Lal Thanhawla hnenah a thehlut.

Chief Minister hnena a banna lehkha a thehluhah hian Dr. BD Chakma hian, Mizoram state qouta-a MBBS zir tura Chakma zirlai 4, National Eligibility cum Entrance Test (NEET) 2017 an inziah tlin thu tarlangin, heng Chakma zirlaite hi Higher & Technical Education Dept. chuan July ni 20 khan 'counselling' tura koin 'counselling' neih zawh a nih hnu, hemi ni vek hian chhan engmah sawi awm lovin Higher & Technical Education Commissioner-in 'counselling' neih tawh chu 'cancel'-in, 'counselling' neih that leh tur, a ti a; 'counselling' neih leh hun tur hi Deptt.-in tun thlengin a la ruat leh lo, a ti a.

July ni 26-a Higher & Technical Edn. Minister Pu R. Romawia thuchhuah siamah MBBS quota chu Mizote tan chauh hauhsak a ni dawn tih chiang takin a lang nia sawiin Dr. BD Chakma chuan hei hi a tan pawm theih a ni lo, a ti a.

Mipui aiawha thlan tlin a nih avangin Minister of State a nih anga hma a laknaah state chung mipui zawng zawngte chu hnam, sakhua leh rindan thliar hrang lova ang khata an rawng bawlsak vek chu a tih tur nia a ngaih avangin a hmalaknaah mi rilru a lo tina a nih chuan ngaihdam a dil a.

Hetiang hi thil awmdan a nih avangin Minister a nih zui zel chu a rem lo nia hriain a banna a thehlut tih Dr. BD Chakma chuan a lehkhaah a ziak a, a banna chu lo pawmsak turin Chief Minister a ngen a ni.

(Corr)

<><><>

AMFU:

Mizorama thar, damdawi leh inhnawih rimtui atana hman chi thlaite inleisak turin AMFU leh Sunflag Agro-Tech Company-te'n inremna thuthlung an ziak dawn tih AMFU President-in a sawi.

Vawiin khan AMFU Gen. Hqrs President,AMFU Lunglei President ni bawk Pu Joseph H. Thanzuala'n Lungleia AMFU office-ah thu thar thehdarhtute kawmin tunkar Ningani khian Lunglei AMFU leh Sunflag Agrotech Company, Jaipur ami ten medicinal, aromatic & economic plant thar chhuah lei turin MoU an ziah dawn thu hi a sawi a. Heng thlaite hi kuthnathawktuten chin nachang an hriat nan a hawnaa beihpui buatsaih a ni ang, a ti.

Thlai tharchhuah hralhna chu AMFU ngaih pawimawh hmasak ber a nih thu sawiin, chumi atan chuan thlai chin tur hralhna hriat

hmasak a, loneitute a nih dan hrilh a, tuina an neih hnuah chintir chauh tha an ti tih AMFU President chuan a sawi a. Tun tumah hian ‘lemon grass’ ching turin hma lak a ni dawn a, Mizoramah hactare 5,009-ah chin tum a ni a, SUNFLAG Agrotech hian an lei theih dawn avangin MoU ziah a ni ang, a ti.

AMFU hian ‘Cytronella’ ching turin Council of Scientific & Industrial Research (CSIR) NE Institute of Science & Technology Jorhat nen pawh MoU an lo ziah tawh thu AMFU President hian a sawi bawh.

(Lunglei PTC)

<><><>

CM MEET NGOS:

Vawiin khan Chief Minister Pu Lal Thanhawla’n a Office-ah Tlawmngai Pawl hrang hrang hruaitute kawmin thil pawimawh a sawipui.

Chief Minister hian Central YMA, Mizo Zirlai Pawl, Mizo Students Union leh National Students Union of India hruaitute chu Mizoram tana MBBS seat pekzat tihhniam a nih chungchang leh Citizenship (Ammendment) Bill 2016 chungchang a sawipui a.

Sawrkar ngaihndan leh hmalaknate a hrilh bakah Mizoram tan leh Mizoram thatna tura NGO hmalaknaahte fimkhur taka thil tih a ngaih thu te a sawi a, hmalak dan tha nia an hriatte an sawiho bawh.

Chief Minister hian kum 2017-18 chhung atana Mizoramin MBBS seat 17 chiah a nei ta chu thil tih dik loh a nih thu leh Mizoram-in Doctor a mamawhna a sang hle a, Mizoram tana MBBS seat pek thin chu 25-ah tihpun leh nise tiin Union Health Minister Jagat Prakash Nadda-a hnenah vawiin khan ziakin a hrilh a ni.

Citizenship (Ammendment) Bill 2016 chu sakhuanna tlawhchhana dik lo taka khua leh tui nihna mi thenkhat hnena pekna remchang a ni tih leh hemi chungchangah hian Mizoram sawrkar pawh Joint Committee on Citizenship (Ammendment) Bill 2016-in tha a tih anga rawn ve ni se, inrawnnaah hian Mizoram chhunga political party te, NGO hruaitute leh sawm bik te pawh telh ve ni se tha a tih thu Chief Minister hian kumin July ni 31 khan Union Law Minister, Ravi Shankar Prasad-a hnenah leh tun thla ni 11 khan Dr. Satyapal Singh, MP, Chairperson, Joint Committee on the Citizenship (Ammendment) Bill 2016 te hnenah lekha ziakin a lo hriattir tawh a ni.

(IPR)

<><><>

SIAHA-NEW INDIA MOVEMENT:

Vawiin khan New Siaha-a MYA Hall-ah KVKleh DRDA te buatsaih, Sankalp Se Sidhi (New India Movement 2017-2022) Programme hman a ni a. Siaha Bialtu MLA Dr. K. Beichhua leh Siah DC Harleen Kaur-I te’n an hmanpui.

Dr.K.Beichhua chuan thu sawiin, vawiin hi Bristish awpbetna nghawngkawh atanga India-in Zalenna a hmuhna kawnga hmalakna pawimawh tak “India chhuahsan rawh” (Quit India movement) tih hmanga ram zalenna sualtuten thutiam an lakna cham vawi 75 na ni a, hruaitu hmasate inpekna leh tawrhna te, Zalenna hlutzia te hre rengin, India-in Zalenna a hmuhna cham vawi 75 thlen nana kum 5 la awm chhung zawng hian theitawp chhuahin India ram hi Ramthar-ah i siam ang u, tiin mipui kalkhawm te chu Thutiam “New India Pledge” a lakpui a ni.

DC Pi Harleen Kaur-i pawhin thu sawiin, India-in zalenna a hmuh cham 75-na a lo thlen hunah chuan kuthnathawktute sum lakluh, a lêta pung tura ruahhmanna chu Sankalp Se Sidhi thil tum pui ber a ni, a ti.

Vawiin New India Programme hmannah hian Prime Minister Narendra Modi-a leh Union Agriculture Minister Radha Mohan Singh-a te thuchhah chhiar chhuah a ni a, Projector hmangin “Freedom Struggle” tih Film chhuah a ni bawk a. Siah RD Block leh Tipa RD Block-te’n Sankalp Se Sidhi kalpui tura ruahhmanna an siam leh hmalak tawhna report-te ngaihthlak a ni bawk.
(Siaha PTC)

<><><>

CHAKMA ISSUE-POL PARTIES:

MNF, ZNP leh MPC party-te’n nakum Assembly inthlanpuiah Chakma Candidate an neih dawn loh thu an sawi.

ZNP chuan vawiin khan NGO-Co-ordination Committee Chairman hnenah lehkha thawnin, NGO-Co-ordination Committee-in Chakma Candidate nei lo tura an ngenna chu an Party PAC-in a ngaihtuah hnuah nakum Assembly inthlan lo awm turah khawi bialah mah Chakma Candidate dah lo turin thuthlukna an siam tih an hriattir a ni.

MPC party pawhin NGO Co-ordination ngenna hi vawiin khan an pawl Sr.Vice President Pu Vanlalhlana hovin an ngaihtuah a. NGO Co-ordination Committee-in Mizoram dinhmun thlira kum 2018 MLA General Election lo awm turah Mizoram Political party tinte Chakma Candidate nei lo tura a ngen angin MPC party OB meeting chuan kum 2018 MLA General Election lo awm turah Chakma Candidate neih loh nise, an ti a.

Brig.T.Sailoa kaihhruai PC party a din tirh atang leh rorelna a chelh chhung pawhin Chakma MLA candidate neih chu sawi loh Unit leh block tak ngial pawh Chakma te chenna ah hian din a ni ngai lova, hei hi Chakma-te huatna leh hnualsuat duh vang hrim hrim ni loin, Chakma Foreigner-te laka ram leh hnam humhim tumna vang a ni, an ti.

MNF Party President pawhin vawiin khan an party-in Chakma Candidate an neih loh tur thu hi sawiin, hei hi BJP nen thawhdun an tum vang a ni lo, a ti.

(PRs)

<><><>

MNF:

MNF President Pu Zoramthanga’n nakum Assembly inthlanpui neih turah tumah thawhpui lovin an mal din dawn tih a sawi.

Vawiina an party Hqrs. Office, Mizo Hnam Run-a an party chhung inkhawmah he thu hi sawiin Pu Zoramthanga chuan, BJP nena thawkho tur anga miin an sawi thin chu thudik lo a ni, a ti a. Kum 30 chhung deuhthaw party dang thawhpui tur leh lo thawhpuiin an lo buai ngar ngar tawh a, sorkar an siam pawhin siam loh pawhin engtik lai mahin tihfuh leh kaltluanpui a la awm thei lo a ti a. AMC-ah an mal din a, an chak tih a sawi a. Hei vang hian an party High Command-in a lo rel tluk tawh angin tumah an thawhpui dawn lo a, a malin an ding dawn tih a puang a. Chakma Candidate an neih loh tur thu an puan pawh ‘BJP nen thawhho an tum vang’ a ni lo, a ti bawk.

Yoga chungchang pawh sawiin Pu Zoramthanga chuan, sorkar zirna in leh office-a tihluihnaa Yoga inzirtir chu tha an ti lova, MNF a sorkar chuan tihluihnain tumah a tihtir dawn lo, a ti a. Bawngtalh khap te, tihluihnaa sakhaw dang inzirtirna tih te, Mizorama tihluihnaa Hindutva lakluh luih te leh Mizote sakhaw ni pawimawh bik, Chawlhni leh ni pawimawh dangte tibuai zawnga

phai lam atanga ruahmanna awm thin te leh VIP lo kal tih te chu an remti ve dawn lova, a tawp thlengin an do dawn tih a sawi bawk.
(PR)

<><><>

TAMIL NADU MERGER

Tamil Nadu-a AIADMK pawl hnihte chu vawiin khan party pakhatah an inchhunfin leh ta a, Chief Minister, Edappadi K Palanisway-a kaihhruai AIADMK leh a phel leh lam Chief Minister hlui, O Panneerselvam-a kaihhruaite hi hmun khata inchhunfin leh tura hun rei tak an inbiak hnuah vawiin khan Chennai-a an party Hqrs-ah party pakhata awmho leh turin inremna an siam a ni.

Pawl pakhata an inchhunfin leh tak avang hian Pu Palaniswamy-a kaihhruai sorkar hi zaninah emaw hian Pu Panneerselvam-a lamte atangin minister thar lak luh belha tihlen a nih rin a ni a, Pu Panneerselvam-a hi Dy. Chief Minister a ni ang.

(Newsonair)

<><><>